

## Sjrieverskrink / Schrieverskrink Noord-Limburg

*Herman Bors, Ruivers*

In de Turfhoeve bie Sevenum waerde 't literaer kiendje gebaore. Ónger leiding van gynaecoloog Colla Bemelmans, muzikaal óngersjteund door Jan Ridderbeekx kwaam ózze sjriefgroep oppe waereld. De klup besjtóng oet volk van Beesel toet Venraoy en van Venlo nao 't weste toe pies in Helde-Panninge. De Turfhoeve zoot vol mit 'ne bóch aspirantsjrievers mer ouch 'n sjtèl door de wol geverfde dialekkanónne die häör sjpaore al döbbel en dwars verdeend haje, kortgezag: ein bóntj gezelsjap van miense die aan lotgenote wilde laote hure waat ze zoe al aan 't pepier toevertrouwe. Aan 't eind van de aovend bleke twintig leje bereid óm samen 'ne sjriefgroep te vorme.

*Herrie in de tent*

Róndj de twintig pennelekkers kwame 'ne maondj bie-ein óm zich te sjtraevele euver de kwaliteit van häör werk. De bie-einkóms sjtóng ónger leiding van Jan Moonen oet Wieërt. Ich zeen ze nag binnekómme: idderein 'n mepke ónger de erm mit daorin de twintig kopieje van dagelang naodink- en sjriefwerk. Idderein gruuëts en beniejd hoe hel de aohhh's en de ahhh's van bewónjering 'm óm de oere zouwe vlege. Mer dae vogel ging neet op. Veur hadde aafgesjpraoke des se ouch kritiek mochs levere. En zoe kós 't gebeure det begin 2005 de sjrieverskrink óntplofde. De dörpelinge van Helje haje genóg van 't commentaar van de 'luuj oet de Stad' en besjlote ter plekke óm op eige gelaegenheid verder te gaon.

*Tieën jaor later*

Binne ein half jaor ware veur veur mier as de helf oetgedund. Mer waal gemotiveerd óm verder te gaon. En hoe! Tien jaor later en veur besjtaon nag altied. Zo'n zeve jaor ónger leiding van Jan Moonen en sins drie jaor mit wisselende veurzitter en notulis. In die tien jaor höbbe veur waal aafsjeid mótte nimme van miense die zin euverleje. En det zaet geliek al get euver de gemiddelde laeftied van de sjrievers. Veur moogde ós gelökkig prieze det veur 'ne tied lang eine junior in ós midde haje en waal Daan Doesborgh oet Tegele. Hae is 'ne bekende Hollenjer gewaore mit zien 'slemgedichte'.

*Óngerwerpe*

Ós kluplokaal lik in Venlo op 't terrein van Auxiliatrix. Dao kómme veur iddere twieë maondj bie-ein. Iers 'n bietje biepraote euver ós aktiviteite op familie- en sjriefgebied en den is 't tied óm get te laote hure. Det geit aan de handj van



*De lede van de Sjrieverkrink  
V.l.n.r. sjtaond: Piet Relouw  
(Kessel), Baer Born en  
Hub Orval (allebei Tegele),  
ingelies aan de moer: Truus  
Verbong-Simons (Tēgele)  
Oppe sjteul: Jeanne van  
Kraay-Apeldoorn (Venlo)  
en Herman Bors (van oppe  
Ruiver)*

ein thema det door deze of gene weurt veurgesjteld. De seizoene, de jaorlikse fieësdag, biezónjere gebeurtenisse in 't laeve, lokasies as kerkhaove en kesjtieële, doe kens 't dich zoe gek neet bedinke of d'r is euver gesjreve. Veur de volgende kier mótte v'r 't höbbe euver 'óngerwaeges'. 't Is sjoen óm te zeen wie idder det op zien eige meneer haet opgepak.

#### *Aktiviteite*

Op dit moment zien veur mit zes sjriever. Toet ós groeët verdreet is Nol Wassen aafgeloupe jaor euverleje. Mer noe haet zich waal weer ein niej lid aangemeld veur kómmend jaor. Det geuf de burger mood. Behalve det veur aanein ós werk laote hure, höbbe veur 't ouch hoeëgerop gezóch. In 2011 kwaam 't boek getiteld *Ketting* oppe mert, ein bloomlaezing van ós sjriefkunste. 't Beukske waas binne de kortste kiere oetverkoch. De oprings goof ós de meugelikheid óm mit aanhang te gaon oet-aete. Ouch haet Piet Relouw ós ein professionele rónjleiding door Remunj gegaeve. De opdrach waas óm 'n gedich veur of euver 'ne boum te sjrieve (daoróm zeen die d'r noe zoe good oet.) Zoe is d'r naeve 't sjrieve zeker plek veur angere zake.

#### *Toekóms*

'Doe mós sjrieve toet 't nimmer geit'. Gezeen de gemiddelde laeftied zin veur neet ech d'r op oet óm de angere nag lastig te valle mit tips. Vreuger sjtraevelde veur ós euver ein accentje, waal of gen heudje op de -o- of euver de juiste oetsjpraak van ein woord. Maar dae tied is veurbie. Kritiek is allein maar positief. Doe kens sjrieve wie des se wils. Waat wet 'ne Venlonaer van Kessel en waat ment 'ne Ruiverse zich waal óm ein oeërdeil te velle euver 't sjitterende Tegels. Ós oetgangspunt is: gank lekker sjrieve, den bös se van de sjtraot.